



Grupu Romansa / Oxfam iha Timor-Leste

SUMÁRIU EZEKUTIVU

SOSIEDADE CIVIL NIA ENVOLVIMENTU IHA AREA POLÍTICA FISKÁL NO DIVERSIFIKASAUN EKONOMIA

Organizasaun sosiedade sivil (OSS) sira seidak iha influensia signifikadu iha area política fiskál no mós política diversifikasaun ekonomia nian tanba fatór balu mak hanesan:

- OSS sira nia envolvimentu iha prosesu dezvoltamentu política públiku sira maioria akontese deit iha nivel ne'ebé OSS sira laiha poder atu deside agenda dezde inísiu no la involve iha prosesu foti desizaun nian. Métodu partisipasaun públiku ne'ebé governu uza barak mak enkontru fahe informasaun no konsultasaun, ne'ebé iha pratika ladún rezulta iha inkorporasaun OSS nia hanoin sira iha política públiku ne'ebé prodús.
- Mekanizmu ne'ebé Governu estabelese hodi fasilita partisipasaun OSS sira nian iha prosesu dezvoltamentu política fiskál no política diversifikasaun ekonomia seidak nato'on ka laos dezeña atu fasilita diskusaun ida ne'ebé kle'an no signifikante entre Governu ho OSS sira.

- OSS sira rasik seidak másimu iha sira nia atividade influensia nian tanba limitasaun ka dezafiu oin-oin, inklui koñesimentu kona-ba asuntu sira liga ba política fiskál no diversifikasaun ekonomia, kapasidade atu halo peskiza, analiza no advokasia bazeia ba evidénsia, no kapasidade atu mobiliza partisipasaun OSS sira, liu-liu sira ne'ebé baze iha munisipiu hodi involve iha prosesu política públiku sira.
- Falta asesu ba informasaun liga ba política publika fiskál no diversifikasaun ekonomia sai dezafiu ba partisipasaun efetivu OSS sira nian tanba la hetan informasaun nato'on iha tempu ne'ebé adekuadu hodi halo analiza ho kle'an molok halo intervensaun ruma. Governu halo ona esforsu hodi hasa'e públiku nia asesu ba dokumentu sira ne'e no publika dokumentu sira ne'ebé uluk la públika. Ida ne'e pasu pozitivu ida ne'ebé importante tebes atu kontinua nafatin, liu-liu atu garantia katak ema ho defisiénsia sira mós bele asesu ba dokumentu sira ne'e.
- Governu iha ona pozisaun fiksa liga ba política públiku sira ne'ebé konsulta ho OSS no laiha intensaun atu halo mudansa ba política sira ne'e bazeia ba rekomendasaun husi OSS sira.

OSS sira estabelese mekanizmu no estratéjia oin-oin hodi haforsa sira nia influensia iha prosesu dezvoltamentu política fiskál no diversifikasaun ekonomia. Mekanizmu sira ne'ebé OSS sira rasik mak kria (created space) fó espasu ba OSS sira atu iha



Grupu promotór ba ema ho defisiénsia / Oxfam iha Timor-Leste

kontrolu liu tan kona-ba oinsá sira komunika sira nia hanoin ba desizaun nain sira, maibé laiha indikasaun katak iha sinerjia entre mekanizmu sira ne'ebé organizasaun ida-idak estabelese. Mekanizmu sira ne'e mós presiza avalia hodi haree nia efektividade atu influensia prosesu foti desizaun tanba maski OSS sira adopta meius oin-oin rezultadu ne'ebé atinje mós seidauk másimu.

Ladún iha OSS barak mak foka sira nia servisu ba asuntu polítika públiku hanesan polítika fiskál no polítika diversifikasaun ekonomia. Maioria organizasaun sira ne'ebé hala'o servisu ba polítika fiskál nian mak hala'o hotu advokasia liga ba diversifikasaun ekonomia nian. Atividade advokasia ba asuntu rua ne'e mós dala barak la'o hamutuk. Maski asuntu rua ne'e iha ligasaun besik ba malu maibé hamosu risku katak atividade advokasia ba diversifikasaun ekonomia nian depende ba periodu OJE nian no OSS bele lakon oportunidade barak hodi influensia prosesu polítika públiku liga ba diversifikasaun ekonomia.

Governu seidauk iha konsisténsia hodi fasilita partisipasaun ema ho defisiénsia no grupu vulneravel no marjinalizadu sira, inklui comunidade LGBTQI+ sira iha prosesu polítika públiku fiskál no diversifikasaun ekonomia. Dokumentu polítika públiku sira seidauk prodús iha formatu ne'ebé fasilita ema ho defisiénsia atu bele mós asesu ba. Komunitade LGBTQI+ sira ne'ebé sai parte importante husi sosiedade Timor-Leste nian, ne'ebé iha direitu hanesan mós Timor oan hotu sei sente katak sira nia aspirasaun sira la mosu iha planu OJE, ne'ebé ho konsiente taka matan ba ezisténsia comunidade LGBTQI+ sira nian.

Respondente sira husi Governu no Parseiru Dezenvolvimentu sira fó énfaze ba papél OSS nian nudár ponte ba lian husi comunidade sira ne'ebé la to'o ba governu. Ida ne'e papél importante ida ne'ebé OSS barak bele hala'o tanba sira servisu besik liu ho comunidade. Aproximasaun ida ne'e mós mak sai hanesan valor úniku ne'ebé OSS sira iha hodi bele maximiza sira nia influensia iha prosesu polítika públiku sira. Maibé OSS sira presiza klaru liu ba interese comunidade ida ne'ebé mak sira representa no oinsá bele adopta OSS sira nia rekomendasaun hodi responde no ajuda comunidade sira ne'e.

OSS sira hanoin katak presiza plataforma ka mekanizmu ida ne'ebé bele fasilita partisipasaun ativu OSS hotu nian, liu-liu sira ne'ebé baze iha munisipiu sira, iha prosesu dezenvolvimentu polítika fiskál no diversifikasaun ekonomia. Organizasaun sira ne'ebé servisu iha munisipiu hanoin katak presiza mekanizmu ka plataforma foun ida tanba mekanizmu sira ne'ebé durante ne'e iha la funsiona di'ak. OSS sira ne'ebé baze iha Dili en jerál hanoin katak presiza re-organiza deit mekanizmu sira ne'ebé eziste ona iha FONGTIL no mós liu husi Rede ka Koligasaun sira.



Kontaktu:

Oxfam iha Timor-Leste

Web: <https://asia.oxfam.org/countries/oxfam-timor-leste-east-timor>

OXFAM

Publikasaun ida-ne'e finansia no produz husi Oxfam iha Timor-Leste. Opiniaun-sira ne'ebé mak espre-sa iha publikasaun ida-ne'e mak autór nian rasik no la-nesesariamente refleta opiniaun-sira husi Oxfam iha Timor-Leste.